



Tiranë, më 10.03.2023

## ANKIM

- ANKUES:** Partia Demokratike e Shqipërisë, përfaqësuar Enkelejd Alibeaj
- OBJEKTI:**
1. Shfuqizimi i vendimit nr. 158, datë 09.03.2023 të Komisionerit Shtetëror të Zgjedhjeve "Për shqyrtimin e kërkesës së "Partia Demokratike" për regjistrimin si subjekt zgjedhor për zgjedhjet për organet e qeverisë vendore të datës 14.05.2023".
  2. Detyrimin e Komisionerit Shtetëror të Zgjedhjeve të regjistrojë si subjekt Zgjedhor "Partia Demokratike e Shqipërisë" sipas kërkesës nr. 27, datë 05.03.2023 dhe dokumentacionit shoqërues të saj, të paraqitur në emër të Partisë Demokratike nga përfaqësuesi z. Indrit Sefa; ose Urdhërimin e regjistrimit si subjekt zgjedhor të "Partisë Demokratike të Shqipërisë"
- BAZA LIGJORE:** Neni 109 i Kushtetutës së Republikës së Shqipërisë, Nenet 21, 64, të Kodit Zgjedhor;
- DREJTUAR:** KOMISIONIT TË ANKIMEVE DHE SANKSIONEVE PRANË KOMISIONIT QENDROR TË ZGJEDHJEVE
- PALË E INTERESUAR:** KOMISIONERI SHTETËROR I ZGJEDHJEVE

Të nderuar anëtarë,

Me kërkesën nr. 27 Prot., datë 05 Mars 2023 të Partisë Demokratike të Shqipërisë, protokolluar me nr. 1337, datë 06.03.2023 në KQZ, kemi paraqitur kërkesën për regjistrimin e Partisë Demokratike si subjekt zgjedhor në zgjedhjet vendore të datës 14 Maj 2023. Me vendimin nr. 158, datë 09.03.2023 të Komisionerit Shtetëror të Zgjedhjeve, është vendosur: "Kthimin për plotësim të dokumentacionit për regjistrimin si subjekt zgjedhor për zgjedhjet për organet e qeverisjes vendore të datës 14 Maj 2023, "Partia Demokratike", sipas arsyetimit të këtij vendimi". Duke qenë se vendimi i Komisionerit Shtetëror të Zgjedhjeve është në kundërshtim me ligjin, bazuar në nenin 21 të Kodit Zgjedhor, i drejtohem Komisionit të Ankimeve dhe Sanksioneve, duke kërkuar shfuqizimin e vendimit nr. 158/2023 të Komisionerit Shtetëror të Zgjedhjeve, bazuar në arsyet ligjore dhe faktet e mëposhtme:



## I. RRETHANAT E CËSHTJES

1. Partia Demokratike e Shqipërisë është regjistruar si parti politike me urdhrin e Ministrit të Drejtësisë nr. 12, datë 19.12.1990.

2. Presidenti i Republikës me anë të Dekretit me Nr. 13864, datë 24.10.2023 ka përcaktuar si datë për zhvillimin e zgjedhjeve për organet e qeverisjes vendore datën 14 Maj 2023.

3. Në zbatim të detyrimeve ligjore si dhe të dispozitave të përcaktuara në Kodin Zgjedhore, brenda afatit ligjor të përcaktuar (jo më vonë se 70 ditë para datës së zhvillimit të këtyre zgjedhjeve), Partia Demokratike e Shqipërisë ka paraqitur kërkesën me Nr. 27 Prot, datë 05.03.2023, për regjistrimin e Partisë Demokratike të Shqipërisë si subjekt zgjedhor dhe dërgimin e dokumentacionit shoqëruar të nevojshëm për regjistrimin në zgjedhjet vendore të datës 14 maj 2023.

4. Në përputhje me pikën 2 të nenin 64 të Kodit Zgjedhor, bashkëlidhur kërkesës për regjistrim janë depozituar aktet si më poshtë:

- a) *Vërtetimin që partia është regjistruar në Gjykatën e Rrethit Gjyqësor, Tiranë – Vërtetimi datë 01.03.2023 i Zyrës së Regjistrimit të Partive Politike pranë Gjykatës së Rrethit Gjyqësor Tiranë.*
- b) *Emrin, mbiemrin dhe adresën e kryetarit të partisë, i cili është personi i autorizuar për të paraqitur kandidatët; emrin zyrtar, shkronjat nistore dhe adresën e partisë; specimenin e vulës së partisë; logon e Partisë Demokratike (në print dhe elektronikisht); emrin, mbiemrin dhe adresën e financierit të partisë; dhe emrin, mbiemrin dhe adresën e personit përgjegjës për komunikimin me KQZ-në – Shkresa e Partisë Demokratike bashkëlidhur.*
- c) *Deklaratën e angazhimit solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe për kushtimin për të konkurruar në zgjedhje në mënyrë të ndershme dhe me integritet – Deklarata bashkëlidhur sipas përmbajtjes së miratuar nga KQZ.*
- d) *Autorizimin e Përgjithshëm – Autorizimi bashkëlidhur i Kryetarit të Partisë.*

5. Nëpërmjet komunikimit elektronik, më datë 07.03.2023 jemi njoftuar për zhvillimin e mbledhjes publike të Komisionerit Shtetëror të Zgjedhjeve për shqyrtimin e kërkesës së paraqitur për regjistrim. Njoftimi nuk është shoqëruar me asnjë projektakt, përveç Rendit të Ditës.



6. Pasi kemi parashtruar kërkesën për regjistrim, Komisioneri ka shpallur vendimin nr. 158, datë 09.03.2023, pa kërkuar asnjë sqarim, vlerësim, pretendim apo koment nga përfaqësuesit e përhershëm të partisë politike në KQZ, duke vendosur:

*“1. Kthimin për plotësim të dokumentacionit për regjistrimin si subjekt zgjedhor për zgjedhjet për organet e qeverisjes vendore të datës 14 Maj 2023, “Partia Demokratike”, sipas arsytimit të këtij vendimi.*

*2. Ky vendim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.*

*3. Kundër këtij vendimi mund të bëhet ankim në Komisionin e Ankimeve dhe Sanksioneve brenda 3 (tre) ditëve nga shpallja e tij.”.*

7. Në vendimin nr. 158/2023 nuk saktësohet qartësisht se cili dokumentacion i mungon kërkesës për regjistrimin e Partisë Demokratike si subjekt zgjedhor, që nevojitet të plotësohet. Mirëpo, duke qenë se dispozitivi i vendimit i referohet arsytimit të tij për të kuptuar dokumentacionin që duhet të plotësohet, konkludojmë se ngrihen dy pretendime nga ana e Komisionerit:

a) Lidhur me “Autorizimin e përgjithshëm” të Kryetarit të Partisë, Komisioneri ka cmuar se atij i mungon qartësia dhe saktësimi i rastit për çështjen e regjistrimit të PD si subjekt zgjedhor. Konkretisht, sipas arsytimit të Komisionerit formulimi *“për regjistrimin në zgjedhjet e përgjithshme vendore të vitit 2023, sipas datës së caktuar me Dekret të Presidentit të Republikës”,* është një formulim që le vend për një formulim të dytë, që mund të konsiderohet edhe krejt i ndryshëm nga formulimi në fjalë. Për këtë qëllim, ne kuptojmë nga arsytimi se Komisionerit i duket më i përshtatshëm formulimi *“për regjistrimin në zgjedhjet për organet e qeverisjes vendore të 14 maj 2023”.*

b) Deklarata e angazhimit solemn “për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet”, është nënshkruar nga Nënkryetari z. Enkelejd Alibeaj, sipas autorizimit të shprehur në “Autorizimin e Përgjithshëm të Kryetarit të Partisë”, datë 18 Mars 2022. Sipas vlerësimit të Komisionerit *“nga përmbajtja e nenit 64, pika 2, shkronja “e” të Kodit Zgjedhor, del qartë që ky detyrimi për kryetarin e partisë nuk është i transferueshëm, apo i delegueshëm tek të tretët, sepse është një akt individual i personit dhe akt ekskluziv i kryetarit të partisë. Dispozita e përcakton qartë që deklarata është përgjegjësi e kryetarit të partisë dhe nëse ligji ty të ngarkon si marrës përgjegjësish, je ti dhe vetëm ti që duhet të përgjigjesh përpara ligjit për mospërmbushjen e asaj përgjegjësie”.*

8. Është fakt i njohur botërisht dhe që nuk ka nevojë të provohet, se prej një kohe të gjatë Partia Demokratike e Shqipërisë, partia më e madhe e opozitës, po kalon një



periudhë konflikti të brendshëm, dhe në mungesë në detyrë të Kryetarit të Partisë. Në përputhje me rregullat e brendshme të funksionimit të Partisë Demokratike (konkretisht nenit 46 të Statutit të PDSH), që përcaktojnë se: “Kryetari i Partisë ndihmohet nga Nënkryetarët dhe Sekretari i Përgjithshëm.....Kryetari i Partisë gjatë veprimtarisë së tij të përditshme i cakton detyra dhe fusha të caktuara përgjegjësie Nënkryetarëve të Partisë. Në mungesë të zgjatur të kryetarit dhe me autorizim të tij, njëri prej tyre zëvendëson Kryetarin”, është lëshuar Autorizimi i Përgjithshëm datë 18 Mars 2022. Për shkak se dorëheqja e Kryetarit është fakt, edhe pse nuk është pasqyruar në regjistërin e partive politike, për shkak të moszgjedhjes së Kryetarit të ri të Partisë Demokratike të Shqipërisë, në kuptim të ligjit nr. 8580, datë 17.02.2000 “Për partitë politike”, i ndryshuar, funksionimi i Partisë Demokratike për aspektet që kanë të bëjnë me zgjedhjet vendore realizohet sipas “Autorizimit të Përgjithshëm” të datës 18 Mars 2022.

9. Në “Autorizimin e Përgjithshëm” të datës 18 Mars 2022, përcaktohet shprehimisht se:

*“Unë, Lulzim Basha, me funksion Kryetar i Partisë Demokratike, lidhur me zgjedhjet vendore 2023, sipas datës së caktuar nga Dekreti i Presidentit të Republikës, në përmbushje të kompetencave të Kryetarit të Partisë, autorizoj ushtrimin e tyre nga Nënkryetari i Partisë z. Enkelejd Alibeaj; dhe/ose Sekretari i Përgjithshëm z. Gazment Bardhi; dhe/ose Sekretari për çështjet ligjore dhe zgjedhore z. Indrit Sefa, lidhur me çështjet e mëposhtme:*

*Në zbatim të përcaktimeve të ligjit nr. 10019/2008 “Kodi Zgjedhor i Republikës së Shqipërisë”, i ndryshuar, lidhur me zgjedhjet vendore 2023, sipas datës së caktuar nga Dekreti i Presidentit të Republikës, të autorizuarit si më sipër, kanë të drejtë, të gjithë sëbashku, ose vec e vec:*

**1. Të nënshkruajnë aktet për paraqitjen e kandidatëve të Partisë Demokratike për të gjitha organet e njësive të qeverisjes vendore.**

**2. Të nënshkruajnë deklaratën, në emër dhe për llogari të kryetarit të partisë, ku përmendet angazhimi solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet, sipas tekstit të deklaratës të përcaktuar nga KQZ-ja. Deklarata e nënshkruar prej tyre konsiderohet si angazhim solemn i ndërmarrë prej meje si Kryetar i Partisë, duke marrë përsipër të gjitha detyrimet dhe përgjegjësitë që rrjedhin prej saj.**

**3. Të nënshkruajnë vetë ose të autorizojnë persona të tretë për të nënshkruar dokumentet për regjistrimin e Partisë Demokratike e Shqipërisë (PD) në Komisionin Qendror të Zgjedhjeve; të nënshkruajnë kërkesa ankimore pranë Komisionerit Shtetëror të Zgjedhjeve (KSHZ), Komisionit të Ankimeve dhe Sanksioneve (KAS) dhe Kolegjit Zgjedhor (KZ); si dhe çdo kërkesë tjetër që do të nevojitet në organet drejtuese të KQZ ose të autorizojnë persona të tretë për të nënshkruar aktet e mësipërme dhe për përfaqësimin pranë këtyre organeve me tagra të plota pa kufizim për mbrojtjen e interesave zgjedhore të PD sipas Kodit Zgjedhor.**

**4. Të nënshkruajnë vetë ose të autorizojnë persona të tretë për të nënshkruar, depozituar dhe për t'u paraqitur për përfaqësim pranë Komisionit Qendror të Zgjedhjeve dhe organeve drejtuese në kuptim të nenit 12 të Kodit Zgjedhor, pranë Kolegjit Zgjedhor apo pranë çdo**





*gjykatë për zgjidhjen e çdo problemi zgjedhor, si dhe pranë të gjitha Komisioneve Zgjedhore për Administrimin e Zgjedhjeve (KZAZ), propozimet e Partisë Demokratike për anëtarë të KQV-ve, anëtarë të GNV-ve, vëzhguesit në KZAZ, KQV, VNV, si dhe korrespondencën tjetër me KQZ-në dhe KZAZ-në përkatëse, pa u kufizuar në të drejtën për të revokuar apo ndryshuar çdo autorizim të leshuar.*

*5. Të nënshkruajnë vetë ose të autorizojnë persona të tretë për të nënshkruar çdo lloj kërkesë që nuk është përmendur këtu në kuadër të mbrojtjes së interesave zgjedhore të Partisë Demokratike përpara organeve të KQZ-së, organeve publike, organeve gjyqësore, apo presonave juridikë të tjerë, publikë ose privatë.*

*6. Të përmbushin çdo detyrim dhe përgjegjësi tjetër në zbatim të Kodit Zgjedhor.*

*Ky autorizim është i vlefshëm derisa të jetë ndryshuar, apo revokuar shprehimisht nga Kryetari i Partisë.”.*

## II. ANALIZA LIGJORE

10. Neni 64 i Kodit Zgjedhor parashikon se: “1. Çdo parti politike duhet të paraqesë kërkesën për t’u regjistruar si subjekt zgjedhor në KQZ jo më vonë se 70 ditë përpara datës së zgjedhjeve. 2. Për t’u regjistruar si subjekt zgjedhor për çdo lloj zgjedhjeje, një parti politike duhet të paraqesë në KQZ: a) vërtetimin që partia është regjistruar në Gjykatën e Rrethit Gjyqësor, Tiranë; b) emrin, mbiemrin dhe adresën e kryetarit të partisë, i cili është personi i autorizuar për të paraqitur kandidatët; c) emrin zyrtar, shkronjat nistore dhe adresën e partisë; ç) specimenin e vulës së partisë; d) emrin, mbiemrin dhe adresën e financierit të partisë; dhe dh) emrin, mbiemrin dhe adresën e personit përgjegjës për komunikimin me KQZ-në; e) deklaratën me shkrim të nënshkruar nga kryetari i partisë politike ku përmendet angazhimi solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet. Teksti i deklaratës përcaktohet nga KQZ-ja.”.

11. Nga dokumentacioni bashkëlidhur kërkesës për regjistrim nr. 27 Prot., datë 05.03.2023, rezulton se Partia Demokratike e Shqipërisë ka paraqitur dokuemntacionin e plotë të kërkuar nga ligji për regjistrimin si subjekt zgjedhor, ku përfshihet”

a) Vërtetimi datë 1 Mars 2023 të Zyrës së regjistrimit të Partive Politike pranë Gjykatës së Shkallës së Parë Tiranë, ku vërtetohet që partia është regjistruar në Gjykatën e Rrethit Gjyqësor, Tiranë - kusht ligjor i përcaktuar në shkronjën “a”, të pikës 2, të nenit 64 të Kodit Zgjedhor.

b) Shkresën nr. 27/1 Prot., datë 05.03.2023 të Partisë Demokratike të Shqipërisë, ku përcaktohen emri, mbiemri dhe adresën e kryetarit të partisë, i cili është personi i autorizuar për të paraqitur kandidatët; emri zyrtar, shkronjat nistore dhe adresa e partisë; specimenin e vulës së partisë; emri, mbiemri dhe adresa e financierit të partisë; dhe emri, mbiemri dhe adresa e personit përgjegjës për komunikimin me KQZ-në.



c) Deklaratën e angazhimit solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet.

d) Deklaratën për hapjen e llogarisë së posacme namakre të partisë politike.

12. Në kuptim të nenit 64 të Kodit Zgjedhor, Komisioneri Shtetëror i Zgjedhjeve kishte detyrimin ligjor për regjistrimin e Partisë Demokratike të Shqipërisë si subjekt zgjedhor. Pretendimit e tij të shprehura në vendimin nr. 158/2023, jo vetëm janë të pamunduara të përmbushen, por nuk kanë asnjë mbështetje ligjore dhe për pasojë janë një justifikim i paligjshëm për të penguar regjistrimin si subjekt zgjedhor të Partisë Demokratike të Shqipërisë, partisë më të madhe të opozitës në vend.

### *A. Lidhur me pretendimin për paqartësi të përmbajtjes së "Autorizimit të Përgjithshëm"*

13. Komisioneri ka cmuar se Autorizimit i mungon qartësia dhe saktësia i rastit për çështjen e regjistrimit të PD si subjekt zgjedhor. Konkretisht, sipas arsyetimit të Komisionerit formulimi "*për regjistrimin në zgjedhjet e përgjithshme vendore të vitit 2023, sipas datës së caktuar me Dekret të Presidentit të Republikës*", është një formulim që le vend për një formulim të dytë, që mund të konsiderohet edhe krejt i ndryshëm nga formulimi në fjalë. Për këtë qëllim, ne kuptojmë nga arsyetimi se Komisionerit i duket më i përshtatshëm formulimi "*për regjistrimin në zgjedhjet për organet e qeverisjes vendore të 14 maj 2023*".

14. Ky pretendim nuk ka asnjë mbështetje ligjore. Në Autorizimin e përmendur nga ana e Komisionerit Shtetëror të Zgjedhjeve dhe më konkretisht atë të datës 18.03.2022 përcaktohet qartësisht se: "*Në zbatim të përcaktimeve të ligjit nr. 10019/2008 "Kodi Zgjedhor i Republikës së Shqipërisë", i ndryshuar, lidhur me zgjedhjet vendore 2023, sipas datës së caktuar nga Dekreti i Presidentit të Republikës, të autorizuarit si më sipër, kanë të drejtë, të gjithë së bashku, ose vec e vec...të nënshkruajnë dokumentet për regjistrimin e PD*". Siç shihet qartësisht nga formulimi të autorizuarit kanë të drejtë që të regjistrojnë partinë në zgjedhjet e përgjithshme vendore të vitit 2023 në datën e përcaktuar sipas dekretit të Presidentit të Republikës për këto zgjedhje. Formulimi "*për regjistrimin në zgjedhjet e përgjithshme vendore të vitit 2023, sipas datës së caktuar me Dekret të Presidentit të Republikës*", ka ekzaktësisht të njëjtin kuptim me formulimin "*për regjistrimin në zgjedhjet për organet e qeverisjes vendore të 14 maj 2023*".

15. Në Kushtetutë dhe më konkretisht në nenin 109 të saj përcaktohet se: "*Organet përfaqësuese të njëjësive bazë të qeverisjes vendore janë këshillat, të cilat zgjidhen çdo*



*katër vjet me zgjedhje të përgjithshme, të drejtpërdrejta dhe me votim të fshehtë".* Pra siç shihet qartësisht Kushtetuta përcakton në mënyrë të detajuar natyrën periodike të zgjedhjeve të përgjithshme vendore. Zgjedhjet vendore paraardhëse janë zhvilluar në 30.06.2019. Zgjedhjet e ardhshme të përgjithshme vendore do të zhvillohen në vitin 2023 dhe më konkretisht me anë të Dekretit të Presidentit të Republikës së Shqipërisë Nr. 13864 datë 24.10.2022 është përcaktuar data 14.05.2023.

16. Në rastin objekt shqyrtimi kemi të bëjmë me një Autorizim të Përgjithshëm ku në të gjitha rastet të Autorizuarit të kenë të drejtë të ushtrojnë të gjitha tagrat për të përmbushur të gjitha kompetencat, të drejtat dhe detyrimet që i takojnë personit që ka deleguar këto kompetenca. Në rastin konkret në Autorizimin e Përgjithshëm të lëshuar nga Kryetari i Partisë në detyrë në momentin e lëshimit në datën 18.03.2022 personat e autorizuar kanë të drejtën që kërkojnë regjistrimin Partisë Demokratike të Shqipërisë në zgjedhjet vendore të përgjithshme që do të zhvillohen në vitin 2023 në çdo datë që do të përcaktonte Presidenti i Republike me anë të Dekretit. Për sa më sipër, në çdo datë që Presidenti i Republikës dekreton për mbajtjen e zgjedhjeve të përgjithshme vendore, të autorizuarit do të kishin të gjithë tagrat për të drejtuar kërkesën për regjistrimin e partisë në ato zgjedhje vendore. Për pasojë, pretendimi se do të duhet të përcaktohej qartësisht dekreti ose data e zgjedhjeve nuk ka asnjë bazë ligjore dhe për pasojë është një pretendim i pambështetur në ligj.

17. Nga ana tjetër, neni 26 i Kodit Zgjedhor përcakton se: *1. Partitë politike ose koalicionet e partive politike, që regjistrohen për të marrë pjesë në zgjedhje, nëpërmjet personit përgjegjës për komunikimin me KQZ-në, mund të caktojnë me autorizim një përfaqësues dhe një zëvendës të tij pranë KQZ-së, me tagra përfaqësimi për gjithë periudhën deri në shpalljen e rezultatit përfundimtar. Përfaqësuesit e partive parlamentare i ushtrojnë tagrat e përfaqësimit edhe jashtë periudhës së përcaktuar në fjalinë e parë të kësaj pike. 2. Përfaqësuesit e subjekteve zgjedhore në KQZ kanë të drejtë: a) të paraqesin kërkesa dhe propozime pranë KQZ-së;...Të gjitha veprimet e kryera nga përfaqësuesit e subjekteve zgjedhore në KQZ konsiderohen sikur të jenë kryer nga vetë subjektet zgjedhore.* Partia Demokratike është parti parlamentare dhe gjatë gjithë periudhës zgjedhore dhe jashtë kësaj periudhe personi i përgjegjës për komunikimin midis PD-së dhe KQZ-së ka qënë Z. Indrit Sefa, i cili ka qënë i legjitimuar dhe më parë dhe ky legjitimim është pranuar nga ana e KQZ-së, për të drejtuar kërkesa KQZ-së, pa përjashtuar ligjërisht edhe mundësinë për paraqitjen e kërkesës për regjistrimin në zgjedhje. Edhe në mbështetje të këtij parashikimi, përveç autorizimit të shprehur në "Autorizimin e Përgjithshëm" të datës 18 Mars 2023, kërkesa për regjistrimin e Partisë Demokratike të Shqipërisë është nënshkruar nga personi përgjegjës për komunikimin dhe më konkretisht nga z. Indrit Sefa, i cili ka qënë qartësisht i legjitimuar dhe më parë si përgjegjës për komunikimin me KQZ dhe ka të gjithë tagrat për të drejtuar kërkesa dhe gjithashtu për të drejtuar kërkesën për





të regjistruar Partinë Demokratike të Shqipërisë në zgjedhjet vendore të përgjithshme të datës 14.05.2023.

18. Në vendimin e Komisionerit nr. 158/2023 nuk përcaktohet se në cilin akt rregullator të zgjedhjeve (ligj, vendim, urdhër apo udhëzim) është përcaktuar se Autorizimi i Kryetarit të Partisë për të deleguar ushtrimin e të drejtave/kompetencave, duhet të përmbajë në mënyrë specifike datën e zhvillimit të zgjedhjeve. A ka ndonjë akt procedural nga Komisioni Rregullator i cili të ketë miratuar ndonje format të detyrueshëm apo ndonjë tekst të posaçëm në të cilin të përcaktohet qartësisht detyrimi i përmbajtjes së autorizimit? A ka ndonjë format të posaçëm në Kodin Zgjedhor në të cilin të përcaktohet qartë mënyra e formulimit të Autorizimit, ku nuk lejohet të referohet në mënyrë të përgjithshme dekreti i Presidentit të Republikës që cakton datën e zgjedhjeve, por nevojitet të specifikohet data konkrete e zgjedhjeve? Përgjigjet e këtyre pyetjeve rezultojnë të qarta edhe në vetë arsyetimin e vendimit të Komisionerit, ku nuk citohet asnjë dispozitë ligjore apo nënligjore që të ketë përcaktuar këtë detyrimi, përvec opinionit personal dhe ekstraligjor të Komisionerit, për ti dhënë një kuptim tjetër, një formulimi që ka vetëm një kuptim: Të drejtën për të regjistruar PD në zgjedhje në datën që ka caktuar dekreti i Presidentit të Republikës dhe që është vetëm një datë - 14 Maj 2023.

## ***B. Lidhur me Deklaratën e angazhimit solemn***

19. Sipas vlerësimit të Komisionerit *“nga përmbajtja e nenit 64, pika 2, shkronja “e” të Kodit Zgjedhor, del qartë që ky detyrimi për kryetarin e partisë nuk është i transferueshëm, apo i delegueshëm tek të tretët, sepse është një akt individual i personit dhe akt ekskluziv i kryetarit të partisë. Dispozita e përcakton qartë që deklarata është përgjegjësi e kryetarit të partisë dhe nëse ligji ty të ngarkon si marrës përgjegjësish, je ti dhe vetëm ti që duhet të përgjegjesh përpara ligjit për mospërbushjen e asaj përgjegjësie”*.

20. Ky interpretim dhe arsyetim i Komisionerit si dhe përfundimet e arritura në bazë të tij janë rezultat i kuptimit dhe interpretimit të gabuar të ligjit. Nga arsyetimi i vendimit (pika 3 e etij) konstatohet se Komisioneri e klasifikon nënshkrimin e deklaratës si një detyrim personal dhe individual të kryetarit të partisë, në llojin e detyrimeve dhe përgjegjësi që marrin përsipër personat fizikë/natyrorë karshi të tretëve. Ndonëse në tekstin e pjesës arsyetuese të vendimit ky koncept nuk është i shprehur qartësisht dhe me formulimin e mësipërm, qëllimi dhe qëndrimi i Komisionerit rezultojnë i qartë nga lidhja llogjike/jurdike që bëhet ndërmjet detyrimit/përgjegjësisë dhe pamundësisë së transferimit të tij.

21. Deklarata e angazhimit solemn është nënshkruar nga Nënkryetari z. Enkelejd Alibeaj, në përputhje me situatën dhe kushtet ligjore të përmendura në këtë ankim, në





përputhje me delegimin e shprehur të bërë në Autorizimin e Përgjithshëm të datës 18 Mars 2022, ku specifikohet: ***“2. Të nënshkruajnë deklaratën, në emër dhe për llogari të kryetarit të partisë, ku përmendet angazhimi solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet, sipas tekstit të deklaratës të përcaktuar nga KQZ-ja. Deklarata e nënshkruar prej tyre konsiderohet si angazhim solemn i ndërmarrë prej meje si Kryetar i Partisë, duke marrë përsipër të gjitha detyrimet dhe përgjegjësitë që rrjedhin prej saj.”***

22. Ndryshe nga sa shprehet Komisioneri, nga përmbajtja e nenit 64, pika 2, shkronja “e” të Kodit Zgjedhor, nuk është shprehur asnjë ndalim mbi delegimin e këtij akti, dhe se nuk rezulton që akti të jetë një akt individual i personit dhe akt ekskluziv, për shkak të përgjegjësisë ligjore në rast mospërmbushje. Si për cdo të drejtë apo detyrimi tjetër (për ilustrim, regjistrimi i kandidatëve), dispozitat ligjore i referohen përmbushjes së tyre nga Kryetari i Partisë, duke qenë se ai është përfaqësuesi i partisë politike në raport me të tretët. Ky pretendim i Komisionerit është i pambështetur në ligj dhe rrëzohet edhe nga përmbajtja e vetë deklaratës, sipas përmbajtjes së miratuar nga vetë KQZ-ja. Deklarata fillon me fjalët: “Deklaroj në cilësinë e Kryetarit të Partisë”, cka provon se ajo nuk është një akt individual i personit, por një angazhim që merret në cilësinë e kryetarit të partisë, cilësi e cila është ajo e organit drejtues/ përfaqësues me të tretët dhe jo në cilësinë personale si person fizik/natyror. Vetë Komisioneri në vendimin e tij arsyeton se: “në përputhje edhe me parashikimet e nenit 9 të ligjit 8580, datë 17.2.2000 “Për partitë politike”, i ndryshuar, kryetari i partisë, në kuptim të ligjit është një organ dhe jo thjesht individi person fizik që ushtron funksionet e organit. Në këtë kontekst, deklaratata e bërë në emër të organit që përfaqëson partinë ndaj të tretëve, rast në të cilin përfshihet edhe KQZ, është një akt i delegueshëm, pasi nuk lidhet me cilësi apo përgjegjësi personale të individit, personit fizik që ushtron detyrën e organit të Kryetarit të Partisë.

23. Nëse analizojmë brendinë e tekstit të Deklaratës vëmë re se kjo e fundit është e hartuar si vijon: ***“Angazhimin solemn të Partisë tonë se, pjesëtarët e strukturave drejtuese dhe administrative, të anëtarësisë, kandidatëve për deputetë/ drejtues/ anëtarë të organeve të qeverisjes vendore, deputetë/ drejtues/ anëtarë të organeve të qeverisjes vendore dhe gjithë strukturave të tjera të angazhuara nga subjekti në këto zgjedhje, funksionarë/ ish funksionarë publik do të refuzojnë të marrin pjesë në praktikën e blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale. Angazhohemi të zbatojmë rregulla për të gjithë anëtarësinë, administratën dhe ndjekësit tanë që: Të mos premtojnë/ ofrojnë/ japin para, mallra, shërbime dhe/ose nxisin premtime për punësim apo trajtime të tjera të veçanta votuesve dhe/ose të tjerëve, duke përfshirë familjet e votuesve apo komuniteteve të ndryshme apo të veprojnë në mënyrë të tillë që synohet***



*të ndikojë, ose arsyeshëm pritet të ndikojë në mënyrën se si votuesit japin votën e tyre;...”*.  
Nga analiza e tekstit të deklaratës vihet re se:

a. deklarata fillon me deklarinimin e angazhimit në emër të Partisë, të të gjithë pjesëtarëve, strukturave drejtuese dhe administrative, anëtarëve, kandidatëve, etj, të cilët në tërësinë e tyre përbëjnë të gjithë trupën e partisë, pjesmarrëse në zgjedhje pamvarësisht cilësisë së tyre si anëtarë të partisë apo jo. Pra, në rast se nga kryetari i partisë lëshohet një deklaratë në emër të partisë (në rastin konkret përfshirë edhe jo anëtarët) atëherë kjo deklaratë kurrësi nuk mund të klasifikohet si një deklaratë e bërë në titull personal, e bërë nga një person fizik/natyror, për përgjegjësi apo marrje përsipër përgjegjësish personale. Formulimi tregon qartësisht që jemi në kushtet e një akti që lëshohet në emër të partisë, nga organi që ka për detyrë të përfaqësojë këtë të fundit kundrejt të tretëve e për pasojë është njësoj e delegueshme si cdo tagër tjetër që kryetari i partisë ushtron si organe e që nuk lidhet në asnjë rast me cilësinë personale të individit që ushtron funksionin e organit të kryetarit të partisë.

b. deklarata është, sikurse konstatohet nga emërtimi, por edhe brendia e tekstit të saj, një akt deklarativ, e cila nuk prodhon asnjë përgjegjësi ligjore qoftë kjo edhe personale. Dëshirojmë të sjellim në vëmendjen Tuaj se përgjegjësitë ligjore nuk burojnë nga aktet deklarative por nga ligji. Është shkelja e ligjit që passjell përgjegjësinë e subjektit juridik ose fizik, në formën administrative, civile apo penale. Akti deklarativ i angazhimit dhe vetë teksti i deklaratës nuk tregojnë në asnjë rast marrjen përsipër të përgjegjësiive individuale, përkundrazi janë akt dëshmues a priori i vullnetit të partisë politike, në tërësinë e anëtarëve të saj (madje dhe jo anëtarëve pjesmarrës në fushatën zgjedhore në të cilën partia politike kërkon të regjistrohet si subjekt politik) për mos ushtrimin e praktikave që në rast të zbatimit do të rezultonin në shkelje të ligjit.

c. duke analizuar rastin e shkeljes së angazhimeve që merren përsipër me deklaratën arrihet në konkluzionin se përgjegjësia administrative, apo penale do të rëndonte në rastin e parë mbi subjektin politik, në emër të të cilit lëshohet deklarata, dhe në rastin e dytë mbi individin, person fizik/natyror i cili kryen shkeljen e ligjit penal. Në këtë këndvështrim kryetari i partisë në asnjë nga alternativat e parashtruara më lartë nuk do të mbante përgjegjësi individualisht për shkeljet e realizuara e për pasojë nënshkrimi i deklaratës nga ana e tij nuk do të sillte asnjë pasollë ligjore për individin person fizik i cili ushtron funksionin e kryetarit të partisë. Karakteri solemn e konfirmon këtë, duke i dhënë deklaratës një karakter terësisht me efekt publik, si një mesazh drejtuar anëtarëve, mbështetëseve dhe kandidatëve të subjektit zgjedhor.

24. Për sa analizuar më lartë rezulton qartësisht që arsyetimi i bërë nga Komisioneri për cilësinë me të cilën, kryetari i partisë nënshkruan deklaratën, si dhe arsyetimi



REPUBLIKA E SHQIPËRISË  
KOMISIONI QENDROR I ZGJEDHJEVE

KOMISIONIERI SHTETËROR I ZGJEDHJEVE

Data: 2023

Nr: 158

Ora: 10:00

VENDIM

PËR

SHQYRTIMIN E KËRKESËS SË "PARTISË DEMOKRATIKE" PËR REGJISTRIMIN SI SUBJEKT ZGJEDHOR  
PËR ZGJEDHJET PËR ORGANET E QEVERISJES VENDORE TË DATËS 14 MAJ 2023

Sot më datë, 9.3.2023 në seancë publike, mora në shqyrtim kërkesën me nr 1329 Prot datë 5.3.2023 dhe kërkesë me nr. 1337 Prot., datë 06.03.2023, me:

**Kërkues:** 1) Z. Indrit Sefa, në cilësinë e përfaqësuesit të z. Lulëzim Basha si kryetar i "Partisë Demokratike.

2) Z. Sali Berisha, përfaqësuar nga z. Ledio Nuraj dhe z. Franci Nuri.

**Objekti:** Regjistrimi i "Partisë Demokratike"/ Partisë Demokratike të Shqipërisë si subjekt zgjedhor për zgjedhjet për organet e qeverisjes vendore të datës 14 maj 2023.

**Baza ligjore:** Neni 64 i ligjit nr. 10019 datë 29.12.2008 "Kodi Zgjedhor i Republikës së Shqipërisë", të ndryshuar.

Pasi shqyrtova dokumentacionin bashkëlidhur kërkesave si dhe dëgjova pretendimet e kërkuesve,

V Ë R E J:

Presidenti i Republikës, me Dekretin nr.13864, datë 24.10.2022, ka caktuar datën 14 maj 2023, si datën e zhvillimit të zgjedhjeve për organet e qeverisjes vendore.

"Partia Demokratike e Shqipërisë", nëpërmjet z. Indrit Sefa si i autorizuar nga z. Lulzim Basha në cilësinë e kryetarit të partisë, ka depozituar pranë Komisionit Qendror të Zgjedhjeve kërkesën me nr.

Data: 9.3.2023 Nr:158  
Ora:10:00



Për shqyrtimin e kërkesës e "Partisë Demokratike", për regjistrimin si subjekt zgjedhor për zgjedhjet për organet e qeverisjes vendore të datës 14 maj 2023.

1337 Prot, datë 6.5.2023 për t'u regjistruar kjo parti si subjekt zgjedhor në zgjedhjet për organet e qeverisjes vendore që do të zhvillohen më datë 14 maj 2023, administruar.

Z. Sali Berisha ka depozituar pranë Komisionit Qendror të Zgjedhjeve kërkesën me nr 1329 Prot, datë 5.3.2023 për t'u regjistruar "Partia Demokratike" si subjekt zgjedhor në zgjedhjet për organet e qeverisjes vendore që do të zhvillohen më datë 14 maj 2023.

Nga shqyrtimi i dokumentacionit evidentohet se kërkesat e depozituara ne KQZ nga kerkuesit e sipër cituar lidhen midis tyre për nga objekti, pasi bëhet fjalë për të njëjtën parti politike që kërkon të regjistrohet si subjekt zgjedhor dhe për këtë arsye duhet të shqyrtohen së bashku.

Kërkuesi z. Indrit Sefa në cilësinë e të autorizuarit nga z. Lulëzim Basha për të kërkuar regjistrimin e Partisë Demokratike të Shqipërisë ka paraqitur si dokumente shoqërues të kërkesës sa vijon:

- a) Vërtetimi i lëshuar nga Zyra e Regjistrimit të Partive Politike, pranë Gjykatës së Rrethit Gjyqësor Tiranë, datë 15.02.2023, nëpërmjet të cilit vërtetohet se Partia "Partia Demokratike", me iniciale "PD" ose "PDSH", me Kryetar z. Lulzim Basha rezulton e regjistruar në dokumentacionin e kësaj Zyre;
- b) Autorizim i përgjithshëm i nënshkruar nga z. Lulzim Basha me datë 18 Mars 2022;
- c) Deklarata e angazhimit solemn e nënshkruar nga z. Enkeled Alibeaj;
- d) Deklarata për hapjen e llogarisë së posaçme bankare të partisë politike, (Model KQZ-04-03) e nënshkruar nga z. Indrit Sefa.

Nga dokumentacioni si më sipër, si dhe nga përmbajtja e kërkesës rezulton se:

- a) Emri zyrtar i partisë është "Partia Demokratike e Shqipërisë" me shkronja nistore "PD" ose "PDSH", me adresë, Bulevardi Zhan D'Ark", Nr. 11, Tiranë;
- b) Kryetari i partisë është z. Lulzim Basha, me adresë, Bulevardi Zhan D'Ark", Nr. 11, Tiranë;
- c) Financieri i partisë është z. Ilir Dervishi, me adresë, Rruga "Kavajës", Kompleksi "Square 21", Hyrja 2, kati 4, Ap.11, Tiranë;
- ç) Personi përgjegjës për komunikim me KQZ-në është z. Indrit Sefa, me adresë, Rruga "Kavajës", Kompleksi "Square 21", Hyrja 2, kati 4, Ap.11, Tiranë;
- d) Specimeni i vulës së partisë është i specifikuar.

Kërkuesi z. Sali Berisha në shoqërim të kërkesës së tij për regjistrimin e Partisë Demokratike ka paraqitur dokumentacioni vijues:

- e) Deklarata e angazhimit solemn (Model KQZ-04-02);

Nga përmbajtja e kërkesës rezulton se:

Data: 9.3.2023 Nr:158  
Ora:10:00



Për shqyrtimin e kërkesës së "Partisë Demokratike", për regjistrimin si subjekt zgjedhor për zgjedhjet për organet e qeverisjes vendore të datës 14 maj 2023.



- e) Emri zyrtar i partisë është "Partia Demokratike" me shkronja nistore "PD" ose "PDSH", me adresë, Bulevardi Zhan D'Ark", Nr. 11, Tiranë;
- f) Kryetari i partisë është z. Sali Berisha, me adresë, Bulevardi Zhan D'Ark", Nr. 11, Tiranë;
- g) Financieri i partisë është z. Arben Ibroja, me adresë, Bulevardi Zhan D'Ark", Nr. 11, Tiranë;
- ç) Personi përgjegjës për komunikim me KQZ-në është z. Ledio Nuraj dhe z. Franci Nuri, me adresë, Bulevardi Zhan D'Ark", Nr. 11, Tiranë;

Dokumentacioni i paraqitur nga kërkuesit më së pari duhet të tregoj mbi legjitimitetin e atij që paraqet kërkesën për regjistrimin e partisë politike si subjekt zgjedhor.

1.

Është e qartë që të drejtën për të kërkuar regjistrimin e një partie politike si subjekt zgjedhor e ka organi drejtues dhe/ose ai organ që e përfaqëson atë parti me të tretët

Në parti të ndryshme organi drejtues apo ai që përfaqëson partinë me të tretët mundet të jetë i ndryshëm. Kjo është zgjedhje e çdo partie. Por në çdo rast ajo cfarë edhe ligjërisht është e përcaktuar, është fakti se një parti politike ka një organ drejtues dhe/ose përfaqësues me të tretët.

Regjistrimi dhe funksionimi i partive politike rregullohet sipas ligjit nr.8580 datë 17.02.2000 "Për partitë politike", i ndryshuar.

Sipas nenit 9 të këtij ligji "Regjistrimi i partive politike bëhet në gjykatën e shkallës së parë të rrethit të Tiranës, e cila mban regjistrin e partive politike. Në regjistrin e partive politike shënohet numri rendor i regjistrimit, numri i aktit, numri i vendimit gjyqësor, data e shpalljes, dispozitivi i vendimit, emri i plotë i partisë, inicialet e partisë, stema e partisë, përshkrimi i konfiguracionit të vulës, emri i kryetarit, numri i anëtarëve themelues shënime për ndryshimin e emrit, konfiguracione të vulës ose të kryetarit të partisë, fshirjes apo mbarimit të veprimtarisë së subjektit, data e bërjes së shënimit, emri, si dhe nënshkrimi i nëpunësit kompetent".

Nga përmbajtja e kësaj dispozite, krahas të tjerave del qartë që (i) është gjykata e shkallës së parë Tiranë kompetente për regjistrimin e partive, (ii) ka një regjistër të partive politike dhe (iii) në regjistrin e partive shënohen krahas të tjerave edhe emri i kryetarit.

Kjo do të thotë që të tretët marrin dijeni mbi identitetin e kryetarit të partisë nga ky regjistër.

Kjo vlen edhe për KQZ për rastin kur kërkohet që ky institucion të shqyrtojë kërkesën e paraqitur nga një parti për t'u regjistruar si subjekt zgjedhor.

Nuk cakton KQZ drejtuesin e një partie. Akoma më shumë ky institucion nuk vendos në një konflikt pretenduesish për kryetar, se kush e ka këtë të drejtë.

As Kodi Zgjedhor, as ligji për partitë politike dhe asnjë ligj tjetër nuk ia jep këtë kompetencë KQZ-së.

Nga shqyrtimi i dokumentacionit që ka shoqëruar kërkesat për regjistrim të Partisë Demokratike, ajo e z. Sali Berisha dhe ajo e z. Lulzim Basha (e prezantuar kjo e fundit në këtë

Data: 9.3.2023 Nr:158  
Ora:10:00



Për shqyrtimin e kërkesës së "Partisë Demokratike", për regjistrimin si subjekt zgjedhor për zgjedhjet për organet e qeverisjes vendore të datës 14 maj 2023.

shqyrtim administrativ nga përfaqësuesi i PD në KQZ), rezulton se kërkesa e z. Lulzim Basha ka të bashkëshoqëruar një vërtetim të Zyrës së Regjistrimit të Partive Politike të Gjykatës së Rrethit Gjyqësor Tiranë, të datës 01.03.2023. Sipas këtij vërtetimi kemi që z. Lulzim Basha është kryetar i Partisë Demokratike.

Pretendimi i përfaqësuesit të z. Sali Berisha mbi atë se z. Berisha përfaqëson shumicën e demokratëve, apo se gjykatat nuk i kanë shqyrtuar në përputhje me ligjin kërkesat për ndryshime statuti apo shkarkim të z. Basha si kryetar të PD, apo se dihet botërisht që z. Basha ka dhënë dorëheqjen, nuk kanë asnjë bazë ligjore.

I vetmi dokumentacion të cilin KQZ (Komisioneri në këtë rast) ka detyrim ti referohet mbi atë se kush është kryetari i PD është vërtetimi i Zyrës së Regjistrimit të Partive Politike të Gjykatës së Rrethit Gjyqësor Tiranë.

Në kushtet kur sipas këtij dokumenti zyrtar të lëshuar nga një institucion publik i ngarkuar me ligj për ta bërë këtë (gjykata), rezulton se kryetar i PD është z. Lulzim Basha, atëhere vetëm ky i fundit ka të drejtën të paraqesi kërkesë për regjistrim të PD si subjekt zgjedhor në zgjedhjet për organet e qeverisjes vendore të datës 14 Maj 2023.

Ndaj Komisioneri Shtetëror i Zgjedhjeve legjitimon z. Lulzim Basha për të paraqitur kërkesën për regjistrimin e PD si subjekt zgjedhor për këto zgjedhje.

2.

Në përputhje me parashikimet e nenit 64 të Kodit Zgjedhor kërkesa për regjistrimin e një partie si subjekt zgjedhor duhet të shoqërohet me një dokumentacion të caktuar.

Nga ana tjetër kërkesa mundet të paraqitet direkt nga kryetari i partisë, ose nga një person tjetër i autorizuar nga kryetari i partisë.

Në rastin në fjalë z. Lulzim Basha ka autorizuar z. Enkelejd Alibej, z. Gazment Bardhi dhe z. Indrit Sefa që vecmas, ose të gjithë bashkë, krahas delegimeve të tjera që ka autorizimi përkatës, të paraqesin kërkesën për regjistrimin e PD-së si subjekt zgjedhor në zgjedhjet për organet e qeverisjes vendore të vitit 2023, sipas datës së caktuar nga Presidenti me dekret.

Ky autorizim mban datën 18 Mars 2022.

Në vlerësim të këtij autorizimi Komisioneri çmon se atij i mungon qartësia dhe saktësia i rastit për çështjen e regjistrimit të PD si subjekt zgjedhor.

Në parim biem dakort të gjithë që përmbajtja e autorizimit është një çështje që duhet konsideruar. Përmbajtja e tij duhet të vlerësohet nëse është në përputhje me parashikimet e kodit Zgjedhor por edhe të dispozitave përkatëse të Kodit Civil mbi përfaqësimin.

A është kjo përmbajtje autorizuese e qartë?

Çfarë e bënë të qartë në përmbajtje autorizimin?

Data: 9.3.2023 Nr:158  
Ora:10:00



Për shqyrtimin e kërkesës së "Partisë Demokratike", për regjistrimin si subjekt zgjedhor për zgjedhjet për organet e qeverisjes vendore të datës 14 maj 2023.

Në rastin në fjalë autorizimi duhet të jetë i qartë në kuptim të dhenies të së drejtës për të kërkuar regjistrimin e partisë politike si subjekt zgjedhor. Pra jo çdo lloj autorizimi edhe pse i lëshuar nga ai që i ka tagrat, në këtë rast nga kryetari i partisë, i jep të drejten përfaqësuesit të kërkojë regjistrimin e partisë si subjekt zgjedhor.

Kur flasim për qartësi të një akti autorizues, apo delegues kjo qartësi konsiston në tre elementë:

- (i) Kush autorizon. Pra, ai që autorizon a e ka këtë të drejtë?
- (ii) Kush autorizohet;
- (iii) Dhe çfarë veprimi duhet të kryejë i autorizuari (përfaqësuesi).

Për dy të parat vlerësoj se qartësia në autorizim ekziston e plotë. Nga regjistri i partive politike, si dokumenti i vetëm të cilit i referohen të tretët (edhe KQZ) për të ditur mbi të gjitha të dhënat për partitë, rezulton se kryetar i PD është z. Basha.

E arsyetuar më lartë këtë moment.

Pra nuk kemi asnjë paqartësi për autorizuesin.

Kush autorizohet gjithashtu nuk është çështje. Nuk kemi diskutime për qartësinë këtu.

Në lidhje me qartësinë e veprimit?

Këtu vlerësoj se autorizimi nuk ka qartësinë dhe saktësinë që kërkon ligji.

Sipas autorizimit kemi që veprimi që duhet të kryejë i autorizuari (krahas të tjerave) është: "Regjistrimin në zgjedhjet e përgjithëshme vendore të vitit 2023".

A është i qartë ky veprim që autorizohet të kryejë i autorizuari nga autorizuesi (kryetari i PD)? Për ti dhënë përgjigje kësaj pyetje, më sëpari le të të japim një përkufizim, apo gjykim mbi qartësinë, apo mbi qartësinë e veprimit në këtë rast.

Që të jetë i qartë një veprim do të thotë që në mënyrën që ai përshkruhet nuk lë vend për një përshkrim/formulim të dytë alternativë/plotësues.

Si është ky formulim në rastin në fjalë?

Vlerësoj se ai formulim le vend për një formulim të dytë. Që mundet të konsiderohet edhe krejt i ndryshëm nga formulimi në fjalë (regjistrimi në zgjedhjet vendore të vitit 2023).

Nëse autorizimi do të ishte, "autorizoj....për regjistrimin e PD si subjekt zgjedhor për zgjedhjet për organet për organet e qeverisjes vendore të 14 maj 2023", është qartë që këtu në këtë rast kemi një formulim të ndryshëm nga ai autorizimit të datës 18 Mars 2022 ("Regjistrimin në zgjedhjet e përgjithëshme vendore të vitit 2023"???)

Duke parë këto dy formulime, cili prej tyre është ai që tregon plotësisht dhe në përputhje me parashikimet e Kodit Zgjedhor aktin delegues për regjistrimin e PD në zgjedhjet për organet e qeverisjes vendore të 14 Maj 2023? Natyrisht ai autorizim që tregon që i autorizuari duhet të



bëjë pikërisht kërkesën për regjistrimin në zgjedhjet për organet e qeverisjes vendore të 14 Maj 2023.

3.

Kërkesa e z. Lulzim Basha (nëpërmjet përfaqësuesit të PD në KQZ) për regjistrimin e PD si subjekt zgjedhor në këto zgjedhje nuk ka përmbushur detyrimin e përcaktuar në nenin 64 pika 2, gërma "e".

Sipas kësaj pike sëbashku me dokumentet e kandidimit për t'u regjistruar si subjekt zgjedhor për çdo lloj zgjedhjeje, një parti politike duhet të paraqesë në KQZ "deklaratën **me shkrim të nënshkruar nga kryetari i partisë politike** ku përmendet angazhimi solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet"

Nga përmbajtja e kësaj dispozite del qartë që ky detyrim për kryetarin e partisë nuk është i transferueshëm, apo i delegueshëm tek të tretët. Dispozita e përcakton qartë që deklarata është përgjegjësi e kryetarit të partisë. Si e tillë ajo nuk është e transferueshme. Deklarata është një akt individual i personit. Ajo nuk është kompetencë apo e drejtë e cila me këtë rast edhe mundej të delegehej.

Nëse ligji ty të ngarkon si marrës përgjegjësish, je ti dhe vetëm që duhet të përgjigjesh përpara ligjit për mos përmbushjen e asaj përgjegjësie.

Për më tepër formulimi i dispozitës është i tillë që tregon qartë se flitet për një akt ekskluziv të kryetarit të partisë. Dispozita përcakton (me dokumentet e kandidimit kërkuar paraqet) "deklaratën **me shkrim të nënshkruar nga kryetari i partisë politike.....**"

Pra sipas kësaj dispozite kërkohet detyrimisht nënshkrimi i kryetarit të partisë në këtë deklaratë. Nëse deklarata do të ishte një akt i transferueshëm tek të tretë, atëherë formulimi i kësaj pike do të ishte ndryshe dhe i mjaftueshëm në përmbajtje si vijon: " **deklaratë nga kryetari i partisë politike ku përmendet angazhimi solemn.....**". Pra nuk do të ishte nevoja që deklarata të kishte elementë të saj "nënshkrimin e kryetarit të partisë".

Për të mos folur më pas edhe për elementin e soleminitet, i cili i shtohet argumentit se ky akt edhe për këtë aspekt formual është tërësisht ekskluzivitet i kryetarit të partisë.

Ndaj në konkluzion të analizës së fakteve dhe dokumentacionit të sipërcituar duhet që të bëhet plotësimi i dokumentacionit bashkëshoqërues të kërkesës për regjistrim të partisë si subjekt zgjedhor.





**PËR KËTO ARSYE:**

Bazuar në nenin 19, pikat 1 shkronja "n", e 2, nenin 64 të ligjit nr. 10019 datë 29.12.2008 "Kodi Zgjedhor i Republikës së Shqipërisë", të ndryshuar si dhe nenin 9 të Ligjit nr. 8580 datë 17.02.2000 "Për partitë politike" i ndryshuar.

**VENDOSA:**

1. Kthimin për plotësim të dokumentacionit për regjistrim si subjekt zgjedhor për zgjedhjet për organet e qeverisjes vendore të datës 14 Maj 2023, "Partisë Demokratike" sipas arsytimit të këtij vendimi.
2. Ky vendim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.
3. Kundër këtij vendimi mund të bëhet ankim në Komisionin e Ankimeve dhe Sanksioneve brenda 3 (tre) ditëve nga shpallja e tij.

**Komisioneri Shtetëror i Zgjedhjeve**

**Ilirjan CELIBASHI**



Data: 9.3.2023 Nr:158  
Ora:10:00



Për shqyrtimin e kërkesës së "Partisë Demokratike", për regjistrimin si subjekt zgjedhor për zgjedhjet për organet e qeverisjes vendore të datës 14 maj 2023.



**PARTIA DEMOKRATIKE E SHQIPËRISË**  
**KRYETARI I PARTISË**

**AUTORIZIM I PËRGJITHSHËM**

*Në zbatim të nenit 46 të Statutit të Partisë Demokratike të Shqipërisë lidhur me çështjet që kanë të bëjnë me zgjedhjet*

Unë, Lulzim Basha, me funksion Kryetar i Partisë Demokratike, lidhur me zgjedhjet vendore 2023, sipas datës së caktuar nga Dekreti i Presidentit të Republikës, në përmbushje të kompetencave të Kryetarit të Partisë, autorizoj ushtrimin e tyre nga Nënkryetari i Partisë **z. Enkelejd Alibeaj**; dhe/ose Sekretari i Përgjithshëm **z. Gazment Bardhi**; dhe/ose Sekretari për çështjet ligjore dhe zgjedhore **z. Indrit Sefa**, lidhur me çështjet e mëposhtme:

Në zbatim të përcaktimeve të ligjit nr. 10019/2008 “Kodi Zgjedhor i Republikës së Shqipërisë”, i ndryshuar, lidhur me zgjedhjet vendore 2023, sipas datës së caktuar nga Dekreti i Presidentit të Republikës, të autorizuarit si më sipër, kanë të drejtë, të gjithë sëbashku, ose vec e vec:

1. Të nënshkruajnë aktet për paraqitjen e kandidatëve të Partisë Demokratike për të gjitha organet e njësisive të qeverisjes vendore.
2. Të nënshkruajnë deklaratën, në emër dhe për llogari të kryetarit të partisë, ku përmendet angazhimi solemn për refuzimin për të marrë pjesë në praktika të blerjes së votës, marrjes së financimeve apo përfitimeve të kundërligjshme, veçanërisht nga ato që vijnë nga aktivitete kriminale, si dhe përkushtimin për të konkurruar në zgjedhje në mënyrë të ndershme dhe me integritet, sipas tekstit të deklaratës të përcaktuar nga KQZ-ja. Deklarata e nënshkruar prej tyre konsiderohet si angazhim solemn i ndërmarrë prej meje si Kryetar i Partisë, duke marrë përsipër të gjitha detyrimet dhe përgjegjësitë që rrjedhin prej saj.
3. Të nënshkruajnë vetë ose të autorizojnë persona të tretë për të nënshkruar dokumentet për regjistrimin e Partisë Demokratike e Shqipërisë (PD) në Komisionin Qendror të Zgjedhjeve; të nënshkruajnë kërkesa ankimore pranë Komisionerit Shtetëror të Zgjedhjeve (KSHZ), Komisionit të Ankimeve dhe Sanksioneve (KAS) dhe Kolegjit Zgjedhor (KZ); si dhe çdo kërkesë tjetër që do të nevojitet në organet drejtuese të KQZ ose të autorizojnë persona të tretë për të nënshkruar aktet e mësipërme dhe për përfaqësimin pranë këtyre organeve me tagra të plota pa kufizim për mbrojtjen e interesave zgjedhore të PD sipas Kodit Zgjedhor.
4. Të nënshkruajnë vetë ose të autorizojnë persona të tretë për të nënshkruar, depozituar dhe për t’u paraqitur për përfaqësim pranë Komisionit Qendror të Zgjedhjeve dhe organeve drejtuese në

kuptim të nenit 12 të Kodit Zgjedhor, pranë Kolegjit Zgjedhor apo pranë çdo gjykate për zgjidhjen e cdo problemi zgjedhor, si dhe pranë të gjitha Komisioneve Zgjedhore për Administrimin e Zgjedhjeve (KZAZ), propozimet e Partisë Demokratike për anëtarë të KQV-ve, anëtarë të GNV-ve, vëzhguesit në KZAZ, KQV, VNV, si dhe korrespondencën tjetër me KQZ-në dhe KZAZ-në përkatëse, pa u kufizuar në të drejtën për të revokuar apo ndryshuar çdo autorizim të leshuar.

5. Të nënshkruajnë vetë ose të autorizojnë persona të tretë për të nënshkruar cdo lloj kërkesë që nuk është përmendur këtu në kuadër të mbrojtjes së interesave zgjedhore të Partisë Demokratike përpara organeve të KQZ-së, organeve publike, organeve gjyqësore; apo presonave juridikë të tjerë, publikë ose privatë.

6. Të përmbushin cdo detyrim dhe përgjegjësi tjetër në zbatim të Kodit Zgjedhor.

Ky autorizim është i vlefshëm derisa të jetë ndryshuar, apo revokuar shprehimisht nga Kryetari i Partisë.

*Tiranë, më 18 Mars 2022*

KRYETARI  
*Lulzim Basha*  
LULZIM BASHA

